

欽定剿平三省邪匪方略

欽定剿平三省邪匪方略正編卷一百九十四

庚申年

七月二十九日己酉明亮奏言查徐添德等逆率

領馬步賊衆經臣自陝截回該匪卽由鄖縣穀

城邊界向東晝夜狂奔臣統兵由二竹房縣催

趨截堵奔竄川陝之路十六日行抵青峯據哨

探報稱賊匪聞大兵在二竹山內攔截已由石

花街盛家壩一帶東竄臣一面照會鎮臣孫清

元德昌就近抄道石花街等處尋蹤躡逐十八

十九等日

臣

由官坊馳抵保康探得該匪已直

向東竄連日兼程由長坪趕赴南漳兜截二十

一日晚間探得賊匪屯聚武安堰攻撲民寨離

臣

行營尙隔六十餘里當卽於五更發兵整隊

前進行抵武安堰賊衆已拔營至朱家嘴正在

攻撲潘家寨居民已形慌亂一見官兵趕到俱

各欣然固守抵禦該匪卽分馬步四隊退佔對
面山梁直迎官兵前來臣將現到馬步官兵亦
分四路分攻撲卽督催巴圖魯侍衛富翰雙
福等帶領

盛京吉林馬兵搶撲左手山梁侍衛塔津保江鼎
總管都當阿等帶領索倫馬兵卽攻撲右手山
梁派副將王懋賞守備王占鰲陳應彪等帶領

廣西官兵隨馬隊由中路趕緊前進派副將樊
雄楚叅將德興等帶領粵東新兵並河南宜昌
官兵沿河直撲賊衆後隊該匪自恃賊夥衆多
吶喊撲壓三次侍衛富翰塔津保等率領兩路
馬兵奮勇仰攻直搶上山梁立斃賊匪三百餘
人兩路賊衆敗退狂奔我兵馳射追殺其兩路
步賊咫尺互相救援

臣

卽飭令各營官兵淌河

搶渡水皆齊腰並無一兵傷損趕至半山正遇
馬步賊匪五六百人在彼捨命抵禦衆官兵奮
勇齊上施放鎗礮卽將該匪衝爲兩段殲戮馬
步賊四十餘人賊始大潰我兵壓過四道山梁
沿途殲擒賊匪二百餘名搶獲火礮鳥鎗騾馬
刀矛旗幟甚多賊匪亂竄逃過溪河淹斃百餘
人官兵追過溪河逼近朱家嘴遙見賊營紛紛

合成大隊排立抗拒護軍副叅領瑪爾呼善馳
馬急過首先衝入賊圍左右馳射連殺數賊身
受矛傷力竭陣亡兩翼馬步官兵由山坡沿河
兜裏飛進兩粵新兵均極奮勇直前施放進步
連環愈逼愈緊共殺賊四百餘人生擒黃駿業
駱楊氏等男婦老幼共二百四名口餘匪翻山
向孔家集東竄拋棄鹽牛器械包裹無數官兵

竟日趕殺百餘里未便窮追正在徹兵間適山
後突出馬賊三四十人抄截官兵後路

臣飛飭

富翰塔津保帶領馬兵分路趕剿射倒十餘賊
內有一騎驟賊持矛亂戳富翰江鼎恒坤趕上
各射中一箭該匪落騎時自稱我係熊總兵不
必亂殺遂經鄉勇陳國年田仕萬擒獲到營

臣

親提先獲之犯黃竣業等訊供徐添德在老營

裏聞官兵到來已帶領婦女矛手先走先鋒徐朝海張德昌打仗時已被馬兵射死尙有四路總兵兩路隨徐掌櫃去熊方青王青二總兵領兵在此打仗等語查黃駿業徐富等一百五十七名實係從賊日久大半皆係川匪當將該犯等立即正法蔡長貴駱楊氏等四十七名口訊係被擄人民即交隨營同知蕭與潔給予路票

盤費各令回籍安插搶獲騾馬驢牛器械分散
兵勇查僞總兵熊方青身受箭矛傷五處猶兇
悍異常訊據該匪供稱自元年教匪起事時卽
與徐添德主謀布陣到處殺人放火稽誅五載
罪大惡極且該犯往來南漳所屬數次攻撲寨
卡該處居民遭其荼毒憤恨入骨當將該犯交
同知蕭與潔督同武安堰巡檢李慶寶卽在武

安堰凌遲處死傳首曾經擾害各寨卡以彰

國法而快人心此次打仗官兵間有傷亡俟查明
咨部辦理再齊齊哈爾委防禦克陞額自陝行
抵光化縣時聞賊已近趕緊來往催船渡兵落
水淹斃再查楚省地勢平衍正可藉馬步兵馳
射破敵尤爲得力惟催辦馬匹甚費周章現在
馬兵四百名內吉林索倫僅各一百名未免尙

形單薄合無仰懇

皇上天恩再飭撥吉林兵二百名黑龍江兵二百名

前來協剿兵威倍壯

臣即可分路兜剿更易得

手

同日倭什布奏言

臣查青號股匪倚恃馬賊當

先肆行衝突今添撥吉林黑龍江官兵一千五

百名得此勁旅定能一舉集事一切應付事宜

均須早爲豫備查馬匹一項業蒙

聖恩先事預籌派撥直隸山西馬各五百匹現經吳
熊光又籌備馬數百匹似已足敷應付第長途
馳解已恐疲乏倒斃而到營後又須隨時添換

臣又於楚北各營擬調戰馬四五百匹以期有
備無患至所需馱驟爲數較多楚省素不出產
現於樊城等處廣爲購覓並知會吳熊光於產

驟各處代僱協濟以利軍行其餘應備之弓箭
鍋帳等項或於各營調撥或飭局員趕製總期
寬爲預備隨到隨行不致稍有缺誤均奏入

上命軍機大臣傳諭姜晟明亮倭什布曰此次明亮
由保康南漳一帶兜截徐添德大股賊匪督飭侍
衛鎮將等搶上山梁痛加殲戮賊匪奔潰後明亮
復飭令各營官兵淌河搶渡緊蹙賊蹤連次克捷

兵威大振首逆徐添德卽可就擒所辦實屬可嘉
明亮現係五品頂戴著加恩超賞三品頂戴俟破
擒首逆徐添德剿盡餘匪捷報到時再將明亮破
格獎擢侍衛富翰塔津保等率領馬兵奮勇仰攻
直搶上山立斃賊匪三百餘人又富翰江鼎恒坤
分路趕剿射倒僞總兵熊方青甚屬出力富翰塔
津保江鼎恒坤俱著交部議敘至兩粵新兵初到

軍營均屬奮勇卽獲勝仗著查明賞給一月錢糧
以示鼓勵護軍副叅領瑪爾呼善首先衝入賊圍
連殺數賊身受矛傷陣亡可惜之至著咨部加等
賜卹委防禦克陞額聞賊匪將近趕緊來往催船
渡兵以致落水淹斃亦屬可惜著照陣亡例賜卹
明亮務當乘賊勢窮蹙之時奮力堵剿將徐添德
生擒解京盡法處治以快人心而申國憲卽或臨

陣殲斃亦必驗明確實毋任漏網至堵禦之事係
總督姜晟巡撫倭什布專責務當督飭防守各卡
隘文武員弁悉如勦西之孔繼楫竹山之范繼昌
實力堵禦不使剿敗賊匪衝出卡座俾明亮得以
統兵趕上一鼓殲除姜晟倭什布若能併力同心
認真防堵則楚省竄匪剋期掃蕩地方一律寧謐
該督撫既可永享昇平且得與明亮等同膺逾格

恩施伊二人不可不倍加奮勉也又明亮奏請撥
吉林兵二百名黑龍江兵三百名赴楚協剿一節
吉林黑龍江官兵原派起數未便折散行走已降
旨諭令長齡將吉林頭起兵二百五十名黑龍江
頭起兵二百名派護軍叅領特克昇額等卽日會
同帶往明亮軍營以資剿捕所有此項勁兵應需
馬匹鑼鍋帳房等項姜晟倭什布祇須按照現撥

兵數預備應付昨又不待伊等奏請降旨令吉慶
將粵海關稅銀撥解三十萬兩赴楚應用似此兵
精餉足更無難迅速戡功也

上又命軍機大臣傳諭長齡曰前因徐添德折竄均
州諭令長齡帶領吉林黑龍江官兵全赴楚省協
同剿辦今明亮現獲勝仗事機極爲順利明亮又
祇請撥給五百名是長齡所帶之兵自可無庸全

數赴楚惟吉林黑龍江原派起數未便拆散行走
著長齡將頭起吉林兵二百五十名頭起黑龍江
兵二百名卽派護軍叅領特克昇額協領五誠額
三等侍衛花尙保總管托爾托保卽日會同帶往
明亮軍營以資剿捕其餘吉林黑龍江官兵一千
五十名著長齡在衛輝地方畧爲停待俟後起兵
丁到齊憩息三兩日長齡卽帶領徑赴經畧額勒

登保大營聽候調遣可也

上諭內閣曰明亮此次生擒偽總兵熊方青並殲
賊匪一千數百名將奮勇出力各員弁開單進呈
黑龍江總管都當阿著賞給阿勒達喇泰巴圖魯
名號仍照例賞銀一百兩盛京佐領委協領伊宗
阿副將樊雄楚著賞戴花翎黑龍江驍騎校部委
叅領卓爾渾保著賞換花翎吉林驍騎校委叅領

德克精保盛京領催部委防禦本德委官部委防
禦卓敏吉林領催部委驍騎校祿精額黑龍江領
催部委驍騎校圖完濟納領催部委筆帖式薩炳
阿前鋒伊爾杭阿西安前鋒部委驍騎校蘇章阿
管帶鄉勇之千總祁祥把總伊凌阿麻光裕均著
賞戴藍翎以示鼓勵

同日台布奏言查王文雄帶兵由七里溝五郎

口截剿竄匪該匪等未得從柳林鋪搶渡卽分
兩股向西鄉奔逃王文雄督兵緊躡該匪等復
合爲一十二夜四更時守卡兵勇見有賊探來
近密報知州宋昌琚總勇下城四面準備黎明
王文雄兵到宋昌琚飛傳附近寨洞居民協助
官兵接仗十三日辰刻賊衆前撲縣城兵民一
齊抵拒賊復翻山亂竄王文雄嚴催兵勇追擊

三十餘里斃賊一百餘名生擒八十餘名招回
本境新裹難民六十餘名餘衆東走白汚峽竄
往茶鎮江岸該處先有宋昌琚派撥千總孫榮
武生王大才等在彼埋伏十四日辰刻該匪等
馬步千餘直抵江岸勢將躡渡經王大才施放
大礮擊斃馬賊一名衆勇復礮斃步賊十餘名
賊遂折回繞茶鎮後山向木竹壩路通石泉等

處逃逸石泉縣知縣李樞煥於是日申刻接報
會同總兵劉之仁沿江上下偵探防堵並將江
邊船隻盡收北岸十五日未刻賊探三十餘騎
前來沿江窺伺劉之仁帶領兵勇督率防江官
兵鎗礮齊發賊匪退回王郎壩中壩屯聚復於
十六日逕來江邊搶渡劉之仁親督各兵沿江
上下施放鎗礮該縣李樞煥亦督自練鄉勇四

百名協同助勢自辰至午賊衆不能渡江仍卽
折回中壩三台山明埡子一帶潛匿此高二馬
五戴家營會合後分出之前一股其後一股仍
在沔縣之大安寬川等處出沒游奕臣於抵沔
後屢飭綸布春九十探蹤邀截無如一見官兵
卽逃其意總欲搶過漢江臣因於十八日遄回
漢中親督道將等於府城南面江岸安設鄉勇

四面圍住列營嚴守並間段搭蓋瞭臺一有賊
信四下齊應以期聲勢聯絡王文雄亦已回至
距城五百里之油房街紮營漢中平原可無他

慮再

臣

接據署白河縣知縣通判嚴一青稟稱

楚匪于六月二十一日偷渡陡河該縣四鄉義
總帶領練勇分路防堵有義首生員吳鴻舉帶
勇在銀洞溝驅住紮二十八日大霧方霽吳鴻

舉督勇截擊至野猫坡山下賊匪蜂擁直出吳
鴻舉在後抵禦身被鎗傷嘔血而死賊衆亦卽
折回鄖縣等情

臣

查吳鴻舉以生員充當義首

業經數年前因出力最久酌給與六品頂戴今
又捍賊陣亡殊屬可憫且使賊匪一過野猫坡
則該縣西南二鄉必遭蹂躪實由該義首奮勇
一仗是以甫經闌入旋即折回其功尤不可沒

可否酌量給予卹典之處出自

天恩

白布又奏言

臣

於本月十八日接據安康縣知

縣趙廷麒稟報十一日申刻有河南兵丁二百

餘各由西來至該縣越嶺關住歇並無將弁帶

領沿途行走安靜詢係王提督軍營兵丁因隨

征年久遣退歸伍其文票係後起攜帶等情當

查王文雄於嘉慶二年秋間由湖北襄陽帶領
河南南北二鎮兵入陝兵行疲乏分別抽換原
係常有之事但既欲遣歸何以該提督並不知

照臣

處恐係賊匪急欲散夥假裝官兵希冀混

過卡隘潛往河南不可不慮嚴飭該縣多選能
幹捕役尾隨夫向另行具報旋准王文雄來札
該提督於十五日接據都司楊光時稟報該兵

等於初六日由堰口拔營赴關東山防堵趁空
攜帶軍器潛逃共一百餘名並訊出現逃各兵
於六月二十內接有家信送到衣履銀兩其家
信內有無別故未能知悉等情

臣

查此項兵丁

從征至四五年之久既已疲乏總應靜候帶兵
大員調濟抽換何得私自離營此時各路疲兵
不少未便稍事姑息且查河南寶豐縣現有糾

衆滋事之案該兵等是否一氣有無勾結均須
徹底查究除脫逃各兵王文雄業經分咨嚴拏
外相應請

旨責令王文雄將原帶將弁係屬何人按名報出分
別懲處以爲各路將不識兵兵不知將者戒

台布又奏言臣 臣二月二十六日接辦糧餉以

來節奉發給餉銀二百九十萬兩除遵

旨轉解甘省五十萬兩及現撥浙商公捐銀五十萬
兩尙無起運信息約計九月初方可到陝不計
外實收銀一百九十萬兩陝省每月應需銀數
早經奏蒙

聖鑒自三月起至現在七月止共六個月所有不敷
之數俱係前後牽扯並於藩庫留發兵餉銀兩
內暫借動用現屆開放餉之期浙江撥項緩

不濟急且到陝後止可留支軍需不煩輕動實
在別無可籌謹據實奏懇

天恩於附近山西省撥給銀數十萬兩迅解來陝以
資接濟奏入

上命軍機大臣傳諭台布曰高馬等賊匪會合後前
股之賊竄至江岸偷渡經總兵劉之仁先將船隻
盡收北岸並率同兵勇施放鎗礮賊匪仍卽折回

中壩一帶潛匿後股之賊仍在沔縣之大安寬川等處游奕復經台布親督道將於漢中南面江岸列營嚴守賊匪未能渡江所辦俱好此時賊匪窺伺漢江意欲偷渡仍當嚴爲守禦著台布督飭綸布春九十並王文雄劉之仁等加意防堵上緊剿辦總不可令其竄過漢江或入南山老林又致剿捕費手其吉林黑龍江官兵內除撥給馬亮四百

五十名令特克昇額等帶赴楚省外尚餘一千五十名仍令長齡帶往經畧軍營此項官兵總須由陝省經過彼時如沔縣一帶兵力不敷剿捕著台布於長齡過陝時與之商酌或留數百名交綸布春九十帶領協剿更爲得力如竟可無需卽告知長齡迅速帶赴經畧大營聽候調遣至義首生員吳鴻舉於六月間楚匪偷渡陡河時督勇截擊身

被鎗傷陣亡殊爲可憫著照千總陣亡例咨部賜卹又據奏王文雄所帶河南兵丁趁空攜帶軍器潛逃共一百餘名此事甚奇從征兵丁私行脫逃旨旨嚴加懲辦台布已令王文雄將逃兵各姓開報現在陝省各處俱設卡隘於該逃兵經過時無難按名盤獲除諭令吳熊光於豫省查拏外著台布飭令地方文武及各卡員弁上緊緝拏一經盤

獲卽按律問擬具奏不可因人數過多稍存姑息
其統領河南兵丁之提督王文雄及原帶將弁等
並著查明一併叅奏以肅軍紀再台布懇請撥銀
一節已諭伯麟撥銀五十萬兩委員解陝該撫務
須撙節支用勿任局員等稍有糜費

上又命軍機大臣傳諭吳熊光曰本日台布奏據安
康縣知縣趙廷麒稟報本月十一日有河南兵丁

二百餘名由西來至該縣越嶺關住歇並無將弁帶領詢係王提督隨營征兵遣退歸伍旋據王文雄來札該提督接據都司楊光時稟稱該兵等於初六日由堰口拔營赴關東山防堵趁空攜帶軍器潛逃共一百餘名各等語實屬大奇之事此項兵丁卽云從征日久間有疲乏總應靜候帶兵大員調濟抽換豈有私自離營結成隊伍携械潛逃

之理現在剿辦川陝賊匪正當喫緊之際若不嚴
拏究辦何以明紀律而肅戎行軍營內遇有一二
各逃兵尙屬事所或有若至一二百名實理之所
必無除諭令台布嚴飭密訪查拏究辦外現在台
布已令王文雄將逃兵按名報出著吳熊光卽將
此項逃兵一百餘名咨查陝省按照名數嚴密查
拏並於各卡隘留心巡緝一經拏獲卽行徹底根

究按律定擬奏明懲辦不必解赴陝省歸案辦理也

上又命軍機大臣傳諭伯麟曰現在陝省需撥銀兩晉省相距甚近卽於捐項內撥給銀五十萬兩遴委妥員迅速解往若捐項銀數不敷卽於藩庫另款內酌量湊足解往

同日吳熊光奏言竊臣現據西路探報該省賊

匪高逆一股已竄至漢中二郿壩地方係在漢
江之南辛逆等股竄至畧陽現有官兵在漢郡
一帶截剿查陝省漢江以南由西鄉紫泉東竄
卽與楚北地方接壤路徑在在可通賊匪被剿
緊急非入川省卽趨楚境是此時楚省甚屬著
重今蒙

皇上諭令吉林等處勁旅一千五百名赴楚不特肅

號一股可以殲除卽高逆等股亦當聞風膽落不敢肆行東竄至青號賊匪連日接據探報已由南漳之武安堰西向鍾宜之麗陽驛轉斗灣等處奔竄官兵業成落後該匪並分出小股或百餘人或數十人於沿江一帶焚擾均經豫省防江員弁帶領兵勇用鎗礮轟擊先後斃賊十餘名賊始退去臬司完顏岱已督率兵勇赴下

游小河口地方嚴防江水尙屬寬深足資攔禦

臣

昨赴江岸巡查各兵勇分段駐守聲勢聯絡

沿江以北均屬寧謐已諄屬完顏岱等加意嚴

防現因吉林等處官兵須由南陽經過臣暫回

南陽郡城將應付兵差一切稍爲部署卽赴鄧

縣適中之地駐劄兼顧陝楚西南兩路再臣欽

奉

諭旨令直隸挑備馬匹解往河南以備官兵乘騎查
吉林黑龍江官兵最爲趨健馬匹尤爲緊要

臣

於前購五百匹之外現復飭局趕緊添購五百

匹以資協濟倘有餘多可撥各營驛不致稍有

糜費且官兵鍋帳亦係要需

臣

現卽飭查豫省

製備帳房酌撥數百架及舊存銅鍋解赴襄陽

應用至官兵過境一應供頓車輛等項業經飛

飭各屬妥爲預備俾官兵隨到隨行不致遲誤

奏入報

聞

欽定剿平三省邪匪方畧正編卷一百九十五

庚申年

八月初二日

壬子

長麟奏言竊

臣

自剿辦伍金柱

冉學勝張世龍等股賊匪後各股賊匪俱向棧

道一帶奔竄經額勒登保節次痛殲賊匪全竄

老林額勒登保在隘口等處防其竄回陝境囑

臣

率同廣厚迅赴秦州鞏昌一帶緊顧西北逼

向東南以便聚而殲除

臣

接札後卽與廣厚先

後由成縣西和禮縣一帶行走初四日趕抵秦州彼時辛聰宋麻子顏勝可魏棒棒等股均在秦州所屬甘泉寺娘娘壩駱駝巷高橋等處滋擾不惟道路梗塞且各賊匪專以搶劫運送各營軍糧爲得計

臣

等不勝憤恨當與廣厚分投

剿捕賊匪狡猾異常多伏於深山密林內每俟官兵過後卽從後突出劫奪鉛藥銅帳等物初

十日廣厚兵過石嘴頭地方前隊已過十餘里
卽有騎馬賊探八人從兩河口突出經帶領後
隊之游擊永泰瞥見一面撥兵百名護送駝獸
一面率領千總馬揚斌等直前趕殺斃賊三名
餘賊奔入溝內永泰卽帶兵三百餘人入溝緊
追正遇馬步賊匪一千餘人蜂擁而出永泰卽
同兵弁搶上山梁奮力迎擊賊匪攻撲數次俱

被壓回正在相持適廣厚在前聞信帶兵折回
策應率同永泰下山直撲賊隊鎗箭齊發殲斃
一百餘人並擊斃執旗賊目一名賊匪卽從應
崖子一帶連夜竄遁傷亡官兵二十餘人

臣與

廣厚復赴各處搜剿所有屯聚甘泉寺娘娘壩
駱駝巷高橋等處各股賊匪均已紛紛逃遁竄
往東南徽雨一帶經額勒登保派兵截剿斬獲

甚多臣等正擬移兵東南會合剿辦適據禮縣

報稱賊匪一股由該縣之向家河奔赴岷州所

屬之湟水地方滋擾查岷州距鞏昌甚近臣與

廣厚卽由娘娘壩等處轉回兼程行走於十三

日趕抵岷州所屬之馬塢繞出賊前向南兜截

賊匪卽由雷家壩一帶向南狂奔沿途拏獲逃

探並投出難民訊知此股賊目卽係顏勝可因

東南有兵截殺是以中途折回向西北逃避探知西北又有官兵攔截仍卽折向西南奔匿等

詔臣等正在仍前窮追間又據報伍金柱冉學

勝張世龍等股賊匪經額勒登保等連日圍搜

老林剿捕緊急又由老林逃出向西奔竄臣與

廣厚卽改由禮縣西和一帶向南迎擊二十日

趕至石家關適額勒登保派來追賊之副都統

阿哈保總兵穆克登布及續派防堵北面之提督定住亦於是日先後趕至石家關左近紮營探知冉學勝張世龍兩股賊匪屯聚西高山查西高山距石家關僅三十餘里因時已日落山高路窄不能進兵臣與定住阿哈保穆克登布等往返商酌定於二十一日五鼓發兵阿哈保穆克登布之兵由南面老關廟何家陽坡天降

溝一帶進剿

臣

與定住廣厚各帶官兵卽由西

高山北面之牛兒坪朱垭子養馬城一帶進剿

詎該匪等於官兵未到之前先已連夜拔營逃

遁阿哈保穆克登布帶兵緊追

臣

與定住廣厚

亦卽帶兵由北面攆擊奔馳六十餘里該匪捨

命狂竄官兵隨追隨剿阿哈保穆克登布一路

殲擒甚多

臣

與定住廣厚一路殲斃賊匪百餘

人生擒三十三名訊係正賊均經正法賊匪連

夜翻山繞林忽合忽分四散奔竄臣恐阿哈保

穆克登布之兵已經窮追南去該匪等若又乘

夜折回即可直達階州西和徑往岷州臣卽與

定住廣厚等帶領官兵在楊家壩終夜堵截未

敢撒動次日探知賊匪繞奔雷家壩卽帶兵趕

至雷家壩西北一帶兜剿不敢稍留餘力至廿

省西北秦州鞏昌等處現在均已無賊並據徽
縣稟報額勒登保率同楊遇春業將陳傑一股
賊匪全數剿盡並將首逆生擒是東面亦已肅
清僅有伍金柱冉學勝張世龍等股及零星小
股各賊匪尙未殄除然已經各路官兵逼向西
南體察賊情實已萬分窮蹙現在額勒登保率
同楊遇春亦自東北追剿前來已入成縣境內

是各股賊匪均已逼歸一隅而各路官兵又復
會合一處自此剿辦更易得手臣惟有與額勒
登保會商剿辦奏入

上命軍機大臣傳諭長麟曰長麟自到甘剿賊一月
有餘總未據有奏報本日遞到馳奏之摺仍係敷
衍塞責所殲賊匪皆係廣厚帶兵剿殺而長麟往
來追截並未趕上賊匪與之接仗所辦何事此時

秦鞏等處均已無賊陳傑一股亦經額勒登保等
搜剿淨盡僅有伍金柱冉學勝張世龍等股其零
星小股賊匪亦經各路官兵逼向西南賊勢已爲
窮蹙長麟務須自知愧勵實力堵截以便額勒登
保等乘勢痛殲斷不可又令賊匪竄回秦鞏一帶
致未被蹂躪地方復遭荼毒况陝省所需銀兩先
後撥給合計已有百萬而甘肅餉項先於陝餉內

撥給五十萬兩儘足敷用更無可藉口尤當趕緊籌辦剋期歲事倘再防堵不力致賊他竄則獲罪甚重不能稍爲寬貸也

同日

上諭內閣曰永保從前在鍾祥北面防堵賊匪所轄官兵共有九千餘名乃不能實力攔截致令賊匪向北奔竄焚燒潯河鎮繞至黃龍壩偷渡滾河是

以

皇考將永保革職拏問解交刑部監禁

諭令俟大功告成再行降旨因軍務尙未辦竣未卽

施恩上年朕親政之初卽仰體

聖意將永保釋放賞給藍翎侍衛令資經畧印信前赴
軍營旋即擢授頭等侍衛今其署理陝西巡撫是
永保從前應得之罪業經原宥伊署理陝撫任內

帶兵在華林山剿辦賊匪適因賊多兵少致有敗
衄如果永保據實具奏則勝負兵家之常原不遽
加之罪乃永保不敢實陳仍復隱飾其辭其罪實
在於此嗣後與明亮分投堵剿賊匪永保遂形氣
餒在大山岔株守不進其逗遛之罪亦無可辭復
降旨革職尋問經大學士九卿等會同審訊定擬
斬候但核其情節尙係軍營通弊卽勒保明亮上

年逮問時其遷延玩誤之處皆所不免朕於勒保
明亮業經先後施恩亦不肯於永保一人獨加重
罪况永保之父溫福前在木果木陣亡究屬歿於
王事勒保現在辦理軍務亦屬出力而永保之罪
尙非必不可原本欲將伊放出發往軍臺贖罪惟
永保屢經効力戎行俱曾獲罪是其於軍旅之事
實非所能且於帶兵不利現在各路軍營連次克

捷大功指日告成軍營將領亦不少伊一人永保
著加恩釋放賞給八品領催自備資斧前赴烏里
雅蘇臺跟隨綿佐辦事以觀後效至景安從前在
河南巡撫任內恒怯無能並不帶兵堵剿惟擇無
賊地方駐守若

皇考知其畏蕙情節必卽加之重罪伊在南陽堵截其
時又不能實力防禦致賊匪於二年間復由羅山

南召等處竄至盧氏從武關闌入陝境擾及川省
種種縱賊之罪若蒙

皇考鑒悉早將伊立正典刑惟因軍營惡習率多謊詞
入告又無人將伊叅劾是以倖免本年朕將數年
來貽誤之封疆大吏各加懲治將景安一併革職
拏問經大學士九卿定擬斬決施恩改爲斬候但
景安應得罪名事屬已往且賊匪到處奔竄地方

官不能堵禦何獨景安爲然亦不值因內地亂民
鋌走稽誅卽將所到省分之督撫等概寘於法况
景安之罪究屬追論尙可寬其一綫著加恩改爲
緩決仍牢固監禁此朕於軍營獲罪大臣格外施
恩苟情節稍有可寬必不肯遽行誅戮若罪在不
赦亦不能廢法曲貸也

臣

等謹案賞罰爲行軍之要道舉錯尤用人

之大經我

皇上鑑空衡平前因軍務日久未竣將數年來貽誤
之封疆大吏永保景安逮問治罪一振戎綱
茲以賊匪漸次殄除

特降恩綸

賈其既往策以後效此不特身受

生成者知所感奮凡在臣民軍中無不銜被

洪慈卽會蹈罪僭亦必勉圖前灌所謂使枉者直乃
大聖人智周仁愛之全量也

初三日癸丑姜晟倭什布奏言竊臣姜晟於二十

三日馳抵襄郡就近察探賊情與臣倭什布會

同籌辦二十四日接據隨營糧員及營務翼長

等稟報賊匪於二十二日先後竄集南漳

武安堰該處向係市鎮居民築有堡寨該匪正

攻撲民寨希圖掠食適明亮帶兵趕到於二十
二日五鼓分路進擊始猶抗拒經明亮督同將
備率領馬隊兵丁直前迎剿搶渡溪河奮力攪
殺斃賊多名追擊二十餘里殲擒甚多生擒偽
總兵熊方青一名散出被擄男婦不少該匪卽
向荆門屬之孔家集一帶前竄臣等當卽差查
并據南漳縣所稟打仗得勝情節均屬相符伏

思該匪既經敗入荆門州境非東南竄通州治
援及驛路卽西南遁向當遠二縣現在明亮一
路官兵由北面躡剿而進若前路得有攔截之
兵尤爲得力查將軍弘豐於前此賊竄入楚時
已曾挑備滿營兵一千餘名并訓練長矛餘丁
數百名數月來弘豐督率操演日臻純熟荆門
距荆郡只一百八十里若以此項挑備滿兵就

近帶赴荆門不惟可壯聲援實足以資夾擊適
弘豐亦有信前來酌商擇要近堵之處

臣等卽

一面移商將此挑備之兵帶至荆門相機截擊
一面飭襄陽局移會荊州府俟該兵丁等離營
之日照例支給鹽糧其餘遠安當陽江陵東湖
等縣除前已飭該地方官集勇堵守外茲復屢
札嚴飭各屬隨時探明賊蹤凡有要隘加緊防

禦其自鍾祥以下沿江口岸亦飭該處防江文武探明賊匪所向跟蹤防堵俾匪衆不得狂奔越渡則乘此勝勢再得一二勝仗可望迅速集事現據探報明亮一路官兵已追剿前進而孫清元等一路官兵亦已趕過宜城日內可與明亮會合臣等并移會明亮孫清元或歸併一路進剿或仍分路兜截總期趕緊剿辦將此股青

號賊匪早就殲除再查副將佛寧前在花果園遇賊接仗力戰陣亡其時尙有隨同帶兵將弁

數員經

臣

等批飭鄭縣確查去後茲據稟報都

司雙柱守備六達色二員曾有家丁到縣稟稱是日與賊打仗該二員奮力衝殺同時被害該縣派令丁役眼同該家丁尋獲屍身收殮惟陣亡候補叅將富勒渾都司花尙阿二員因並無

家丁隨行現值天氣炎熱屍身難以辨認又據
均州稟報賊匪於初六日由花果園竄至該州
周府巷有委赴該處辦理臺站之襄陽府司獄
李鍾遇賊不屈當被戕害已分飭軍需局查敘
傷亡各員弁兵丁銜名分別具詳照例咨部辦
理奏入

上命軍機大臣傳諭姜晟倭什布曰據奏明亮抄擊

折竄賊匪情形俱經明亮奏過尙屬相符至所稱賊匪現已竄至荊門州境明亮一路官兵由北面躡剿若前路得有攔截之兵尤爲得力此則姜晟倭什布及堵守地方官專責該督撫業經嚴飭各屬隨時探明賊蹤凡有要隘加緊嚴密堵禦倘有不遵辦者卽行嚴叅治罪不可稍有姑息徇隱若如孔繼樞之賣心團勇者亦當隨時保奏陞擢用

昭激勸此時賊匪竄近荆門一帶距荊州祇一百
八十里姜晟等移商弘豐將挑備滿兵帶至荊門
相機截擊事屬可行總之楚省剿賊之事責成明
亮堵禦之事責成姜晟倭什布若能剿堵相輔而
行使賊匪無從竄逸速就蕩平百姓安堵則明亮
從前逗遛姜晟倭什布之徇隱及地方官之疲玩
皆不追論並當將明亮姜晟倭什布一體恩敘若

仍前懈弛則當一併治罪伊等平日所積咎愆朕
皆一一默識屆時必當逐條宣示按律懲治如明
亮於已得勝仗後復有鬆懈情事仍當據實奏
又據奏花果園隨同佛寧打仗陣亡之都司雙柱
等俱著查明咨部賜卹

同日

上命軍機大臣傳諭勒保曰據廣興奏達州邪匪起

事係由知州戴如煌借查拏邪教爲名將殷實之家肆行訛詐以致激成事端雖早經革職尙未回籍仍在重慶地方逗遛等語戴如煌在達州知州任內賊私狼籍民怨沸騰人人共知朕亦素所深悉從前宜綿奏戴如煌年力就衰並未敘及欲怨肇釁情事蒙

上諭令將戴如煌革職仍留軍營効力上年朕親政

後節次降旨令勒保魁倫查辦嗣據勒保覆奏以
戴如煌老病無能任聽書差在外滋事以致民間
多有怨言而魁倫覆奏亦祇以該員病廢飭將經
手報銷各案交代清楚勒令回籍俱未將戴如煌
激變之處據實查奏今據廣興奏稱戴如煌私設
衙役至五千名之多首逆祿添德王學禮等曾被
戴如煌拘拏訛銀數千餘兩私行釋放凡有習教

之人無不遭其索詐以致不能安身遂萌異志是
戴如煌實爲邪教啟釁罪魁不可不嚴加懲治豈
得因伊年老病廢任令回籍置身事外此時戴如
煌尙在重慶地方逗遛著勒保卽行提至軍營將
戴如煌在達州任內情查拏教匪爲名勒索銀兩
及激變起事緣由逐一詳悉研鞫速行按律定擬
具奏

初四日

甲寅

德楞泰勒保奏言

臣

等續據探報

大川苟文明等股匪因官兵追剿甚急亡命狂奔復於廣安之花橋子地方商量分成數股或三四百名或一二百名甚至有數十騎爲一路者四散奔逃并令夥黨於該匪等未經竄走之處放火燒房以惑官兵實屬狡詐

臣

德楞泰連

日窮追沿途擒獲潛匿之賊並乘間逃出被擒

男婦又有一百三十餘名口訊悉前情亟須分

兵追捕適

臣

勒保亦於十五日起到遂商同一

面派兵分追一面通飭附近各州縣以此次賊

匪被剿星散窮蹙異常如果策勵各團勇實力

堵截殲擒首逆定當從優獎賞以冀將此股餘

匪悉數殲除連日

臣

等並各路派出鎮將先後

擒殺賊匪又有三百七十餘人多係精壯戰手

訊據活賊供稱均未知苟文明實在去向惟聞
鮮大川率領得力頭目戰手二三百人向响灘
子奔竄_臣等卽連夜督兵追至儀隴所屬之尖
山子據署儀隴縣王燮稟報十七日派典史倪
霄赴蒿枝硎督同寨首陳朝會陳大均等派調
團勇截殺十九日晚間正值鮮大川率衆攻撲
天旗寨適陳朝會等傳集附近團勇趕到殺賊

六十八名生擒偽副元帥吳效古一名次日鮮
大川又復率衆前來攻撲硃寨並許出銀五百
兩贖取吳效古陳朝會等等被鎗擊傷鮮大
川左膀當被匪衆搶救各團勇又復奮力追捕
殺斃並鎗傷賊匪一百二十餘名割獻偽總兵
蘇映品偽先鋒劉興科首級二顆惟鮮大川逃
往巴州境內潛匿查巴州一路先經臣等飭令

原任建昌道劉清署巴州田文煦嚴諭團寨人等凡有賊匪蹤跡必須設法擒獻茲鮮大川被剿情急無處藏身祇帶隨從十餘人在附近韓家祠箐林潛伏欲向韓家祠寨首伊叔鮮文芳鮮文欽等寨上躲匿先遣旗首鮮文屏楊仕山二人赴寨與鮮文芳等密商鮮文芳等以鮮大川係著名首逆斷難收留如鮮文屏能將鮮大

用擒殺卽可將功折罪自保其身愷切開導鮮
文屏楊仕山當卽省悟約爲內應二十一日三
更鮮文芳鮮文欽鮮元明韓毓連等帶領百餘
人前往擒捕聲稱大兵到來鮮大川旋卽驚竄
當被鮮文屏楊仕山用矛戳斃鮮文芳率衆搜
捕並將隨行賊匪楊昌仕等十二人一併殺斃
鮮文屏卽割取鮮大川首級赴營呈驗緣鮮大

川向在响灘子地方居住

臣

等卽傳本地民人

及現獲之吳效古等一一驗認屬實查鮮大川

本係與羅其清首先起事之犯嗣與苟文明同

惡相濟日久稽誅茲幸於余家場新場等處經

官兵痛殲潰敗該逆四竄潛逃而儀隴巴州兩

處地方各官均能督飭團勇認真堵截設計殲

除俾得元兇授首實足快人心而彰

國憲且查鮮大川手下偽副元帥偽總兵先鋒等
均已殲戮靡遺所有此次在事出力文武及寨
首團勇人等容俟查明奏請

加恩至現獲之副元帥吳效古當於訊供後寸磔梟
示所獲各犯其中被擄者祇有楊慶等二十二
人訊明省釋其餘多係戰手均卽隨時正法鮮
大川屍身當經剉骨揚灰並將首級懸示巴州

起事地方以昭炯戒至苟文明率其餘黨數百人現由茨芭河遁入通江縣老山林內相距較遠不值以重兵窮追且據南江縣稟報王士虎等股匪衆現由九龍場一路前奔恐其竄近江岸並據廣元縣稟報該匪等距百丈關不遠而陝省寬川一路之賊又俱逼近廣元自應先其所急

臣

德楞泰卽日帶兵由恩陽河一路先剿

九龍場之賊遇住嘉陵江岸並可就近兼顧廣

元臣勸保因川東一帶賊股尙多七十五追剿

樊人傑一股於十六日在大竹之桿子舖地方

得有勝仗殺賊二百餘名生擒僞先鋒蕭勝宗

並賊匪三十五名七十五由梁山開縣一路跟

蹤追躡而龍紹周唐大信等賊節據太平文武

稟報均已折回川境且張子聰湯思蛟等二股

在東鄉之中河一帶游奕並據東鄉縣楊世榮
稟報自從庾珍張廷鳳投出之後張子聰亦有
悔罪投首之心因此近來在全安鄉屯紮並未
出來滋擾臣等伏思川省各股賊匪均已震懾
兵威如果張子聰真心出投妥爲安撫則其餘
各匪更可不煩兵力聞風瓦解且現奉

諭旨庾珍張廷鳳均令賞給八九品頂戴使之招致

各逆自當仰體

皇仁設法招撫

臣

勒保現已酌帶兵勇馳赴東鄉督

同該地方官妥爲辦理並可就近兼顧龍紹周

等股偵探情形相機剿辦再接據夔州文武稟

報有黃號徐姓等股賊匪由雲陽竄至大寧巫

山界內十三日總兵德英額在水口王家河等

處帶兵堵截該鎮遇賊接仗身受鎗矛傷二處

守備李大發陣亡兵勇衝散賊由八石坪竄去
聞之實深憤懣查徐姓之賊自係徐萬富一股
前因川東一帶尙有零星散賊往來游奕疊經

臣

等嚴飭德英額實力堵截毋任東竄今該匪

等衝破水口等卡一過八石坪卽係湖北房縣
地界德英額旣經受傷勢難帶兵追截現在七
十五剿辦樊人傑一股正當喫緊之際且開縣

雲陽境內尙有劉朝選等股亦須剿辦七十五難以分身查總兵李紹祖與七十五同在一路

臣等業已派令該鎮就近馳往追剿卽於七十

五隊內酌派兵勇二千餘名交令管帶並令其過夔州時抽帶德英額名下兵勇六七百名并巫山城內本有應行撤回湖北兵二百七十餘名一併帶往足資追剿

臣

等仍一面飛咨明亮

倭什布派兵迎截以期兩面夾擊奏入

上命軍機大臣傳諭德楞泰勒保曰鮮大川爲著名
首逆因被剿緊急四散奔逃經德楞泰等分兵追
捕殲賊多名大獲勝仗兇渠授首所辦深爲可嘉
至鮮大川先因僞副元帥吳效古被圍勇生擒向
寨首陳朝會許銀五百兩贖取陳朝會不允卽放
鎗打傷鮮大川左臂奮力追捕殺傷賊匪一百二

十餘名並割獻僞總兵等首級二顆甚爲奮勇噉
朝會著加恩賞給七品頂戴並賞戴藍翎如願授
官職卽著賞給把總俾其奮力自効若不願出仕
卽以翎頂榮身至鮮文芳係鮮大川之叔並不徇
私收留轉勸賊夥鮮文屏等將鮮大川擒殺實爲
深明大義殊堪嘉獎鮮文芳著加恩賞給六品頂
戴並賞戴藍翎如伊願得官卽以千總補用若不

願出仕亦以翎頂榮身其賊夥鮮文屏楊仕山一
經鮮文芳等愷切開導卽能立時悔悟將鮮大川
戮斃亦屬可嘉鮮文屏楊仕山俱著賞給八品頂
戴其隨同鮮文屏等擒捕鮮大川之鮮文欽鮮元
明韓毓連並著德楞泰等酌量賞給銀兩以示獎
勵如再能認真出力卽行奏明酌賞頂戴並著出
示曉諭以鮮文芳係鮮大川之叔若以首逆親屬

科罪尙應緣坐而鮮文屏楊仕山係屬鮮大川旗
手親信駁匪若經官兵拏獲皆應立寘重典之人
今因其能商謀將鮮大川擒殺不但赦其重罪而
且格外邀恩給予頂戴官職何況被賊迫脅隨同
搶刦之人若能翻然改圖將賊首擒殺去邪歸正
豈有不倍加恩賞之理禍福之機轉移甚速本係
賊黨一經改悔卽屬良民不可不共知猛省如此

通江老山林內雖其餘黨不過數百人自不值以
重兵窮追但若任其逃竄難保不復行褻脅德楞
泰勒保二人正在追捕大股賊匪卽不便分身前
往亦應酌派得力將弁跟蹤截擊以期速行擒獲
又德楞泰勒保分剿王士虎龍紹周等股賊匪何

入應往何路朕亦不爲遙制惟在伊二人自行相
機辦理至張子聰雖據稱有悔罪投首之心但賊
情叵測受降不易或因目前乏食率衆來投及至
在營日久難保其不心生反側總須倍加慎重如
張子聰真心投出自可賞給八九品頂戴仍須隨
時防範其隨出賊夥人等皆當妥爲安插不可令
其聚集一處亦不可令其雜處官兵隊內爲要總

以痛加殲戮俾賊匪畏懼乞降方爲可信若徒事
招致轉恐示賊以弱卽如鮮文屏楊仕山將鮮大
引擒殺究因見賊勢日蹙是以各知改計而張子
聰在全安鄉屯聚不動或係意存觀望亦未可知
此時官兵氣盛賊匪已漸渙散實爲極好機會德
楞秦勒保務須乘勝直前趕緊截擊於秋令內將
川省各股賊匪一律辦竣勉之望之又據秦黃號

徐萬富一股賊匪由雲陽竄至大寧巫山界內經
總兵德英額在水口王家河等處帶兵堵截該鎮
遇賊接仗身受鎗矛傷二處守備李大發陣亡兵
勇衝散賊由八石坪竄走等語德英額所受各傷
現在會否痊愈若以受傷身故並當查明據實具
奏至水口王家河一帶既有總兵在彼駐守所帶
兵勇諒必不少營卡自應嚴密何以賊匪猝至卽

被衝散並著德楞泰勒保卽行詳查係何營卡如
實係賊多兵少難於抵禦亦應據實奏明若有疎
縱賊匪情事卽當將守卡之員嚴叅治罪其陣亡
守備李大發著咨部議卹此股賊匪由水口等處
過八石坪卽係湖北房縣地界此時明亮等在南
漳一帶正當剿賊喫緊之時相去較遠難以兼顧
現在德楞泰等已派總兵李紹祖馳往追剿所有

徐萬富一股賊匪卽責成李紹祖一人專司剿辦如能將此股賊匪截回卽在川境剿盡固屬甚善否則亦必須緊躡賊蹤迅速追剿該鎮所帶兵勇計有三千已不爲少自足敷剿捕之用德楞泰等務須嚴飭該鎮責令辦竣此股斷不可令其驅出川境藉詞卸責也